

湖南礦務總公司案鈔



俞中丞

廉三

請設立鑛務總公司摺

奏爲湘省紳商集股設立鍊鑛總廠並分設全省各路鑛務總公司以興地利恭摺仰祈

聖鑒事竊湘省鑛務自前撫臣陳寶箴奏請開辦原欲廣闢利源爲自強之本設局迄今經臣隨時整頓以官本不充商力未厚規模粗具利益尙微近年田收歉薄商業衰疲生利之源日涸一日復經臣督飭各屬紳耆妥籌補救上期有裨

國計下求有益民生自非將全省境內所有鑛產合力開採不足以盡未發之藏收自然之利至於採獲鑛砂尤必自能提鍊方能操縱自如銷路無虞停滯茲據前刑部右侍郎龍湛霖前

湖南鑛務總公司案鈔

一

國子監祭酒王先謙等分勸合省殷實紳商合集鉅貲並招內地各省官商股分合同商定仿造各種西法鍊鑪創設總廠承鍊全省所產鑛砂設立阜湘鑛務總公司承辦中路南路各屬鑛山又據候選道黃忠浩前甘肅候補知府喻光容等陸續招集多股設立沅豐鑛務總公司承辦西路各屬鑛山先後呈請奏咨立案並聲明股本如有不敷再由公司酌借洋款認息償還與

國家無涉等情伏念

朝廷振興鑛務

明詔屢頒卽無妥商承辦尙應廣爲招致况經合省紳商通力

合作自宜因勢利導以責成功當經擇派紳董候選道蔣德鈞
分省試用道朱恩絨員外郎職銜王銘忠經理鍊鑛總廠阜湘
總公司事宜江蘇試用道程衡璣貢生黃霖經理沅豐總公司
事宜並派鑛務局提調分省試用知府黃篤恭協同經理令其
悉心規畫迅速興辦仍飭酌發官本查照部局定章呈繳井口
出口各稅一俟獲有贏餘提成報効

國家毋許稍有隱漏又查各國鑛學皆有專門內地尚不講求
以致動虞虧耗今宜督令公司紳董各就鍊廠鑛場建設學堂
延聘外洋鑛師工程師兼充教習分科課授務取專長庶幾數
年之後可兼收作育人材之效據藩臬兩司會同鑛務局詳請

湖南鑛務總公司案鈔

二

奏咨前來臣維民困之難甦由於商業之不振蓋商權不能歸
一則彼此互競無以杜爭奪之萌商情不能歸一則彼此相猜
亦無以成團聚之體泰西各國商務動設總公司用能深相聯
絡馴至富強故求目前整頓之方誠非分設總公司不足挽救
漫紛紜之弊湘省鑛產繁夥如能眾情翕合採西人之所長持
以堅定之力暫時雖未必遽獲厚利而各處無業貧民已得就
廠傭趁衣食取給有資不致流而爲匪將來逐漸擴充其效必
不止此臣爲維持鑛利起見合無仰懇

天恩飭下外務部統轄鑛路總局將湘省紳商所設鍊鑛總廠
及分辦全省各路鑛產之阜湘沅豐兩公司分別立案以專責

成除咨呈查照外謹會同湖廣總督臣張之洞合詞恭摺具陳
伏乞

皇太后

皇上聖鑒訓示謹

奏光緒二十八年八月初四日奉

硃批外務部路鑛總局知道欽此

鑛務局轉奉院札英鑛師來湘勘鑛照會

爲照會事案於九月十八日奉撫憲俞札開案據經理阜湘鑛
務總公司事宜蔣紳德鈞稟稱鑛務必以勘鑛買山爲第一義
鑛師最難適盛宮保聘來英國頭等鑛師瓦理士布盧特往四

湖南鑛務總公司案鈔

三

川勘鑛擬請順道先勘岳州長沙各屬保護文告必求剴切詳
明又湘中痞類在滬以鑛招搖者不少請飭行上海道照會各
國領事凡湖南鑛務交易必須阜湘沅豐兩公司紳董親到面
議關繫大者具稟請示方足爲憑等情據此查英國鑛師來湘
查勘長岳二府鑛產前已據詳札飭保護茲復據稟各情湘省
鑛產屢開屢輟近雖設局辦理數年尙未大著成效推求其故
總由辨鑛不真採取無術尋得鑛苗旋復告竭或遇佳鑛又爲
水石所阻致墮成功必得精明鑛師查勘指點方能獲益現在
盛宮保所聘瓦理士布盧特係英國頭等鑛師便道來湘勘鑛
乃絕好機緣地方官紳務須加意好爲接待斷不可絲毫輕侮

至地方紳民或有狃於固閉成見不欲開採更有貪詐之徒造言惑眾生事阻撓希圖挾制坐分厚利蓋不知湘省財源已竭盜賊日滋幾有不可終日之勢種植工藝縱或有利可興而觀成要在十年或數十年之後惟鑛砂乃天地生成之物朝採夕獲固當竭力開辦以應急需而種植工藝諸務亦待此爲資本故論目前要務莫急於斯况湘省山嶺層疊蘊蓄深厚彰彰在人耳目當茲門庭洞啟之時譬諸積金衢路不自收取將有掩而取之者地方官紳或未深悉情形猶懷疑慮必應痛切開導俾各了然於心庶望相助爲理若奸徒造言生事惟當嚴拏重辦以儆效尤除出示曉諭並將原稟鈔發由該局查照辦理外

湖南鑛務總公司案鈔

四

合行札飭札到該局立即遵照分飭長沙岳州二府及所屬各州縣剴切開導並移會營務處責成營員認真保護如有稍涉疏懈致生事端定將保護不力文武各官從嚴參辦其奸徒在滬藉鑛招搖一節亦即詳請咨明辦理並移洋務局查照此札等因奉此除移請營務處洋務總局並飭長岳兩府一體認真保護外相應備文照會貴公司請煩查照施行須至照會者

光緒二十八年九月二十九日

稟撫憲勸鑛買地

敬稟者竊職紳等奉辦阜湘總公司鑛務先後前赴漢口上海等處議集華股類多觀望不前議借洋款既慮盈虧莫卜而又

要挾抵押流弊無窮因與商務大臣盛及湘人士之官於江浙者熟計善籌並證以中外通行鑛章欲期股分可集利權可保必以勘鑛買地爲第一義而指地以籌款就款以用人自能漸觀成效茲經盛宮保選聘英鑛師瓦理士布盧特來湘先勘中路南路各屬鑛山再行以次徧勘西路各鑛卽由職紳等約同沅豐總公司紳董通力合作併爲一局糾集同志籌備款項凡可開采之處一律向業主或買或租將來卽以租買之地議作資本招股開采或華或洋但期妥訂合同不必過分畛域蓋鑛山旣屬公司產業則主權在我如召佃收租以主待客固與自失地權者迥不相同查四川鑛章設華益公司以購地專招華股又設會同公司以開采兼集洋商遠近謂其章程妥善似宜采擇職紳等揣時度勢詢謀僉同惟茲事體大未敢擅專爲此稟懇大人俯賜察核批示分檄遵照實爲公便

鑛務局移奉院札轉准外務部咨文

爲移知事案奉撫部院俞札開光緒二十九年正月十二日承准外務部咨開光緒二十八年十二月初六日接准咨稱據辦理湖南鑛務總局司道詳稱本局設立阜湘沅豐總公司承辦湘省各路鑛山業蒙奏奉

俞旨並札派紳董經理在案茲據兩總公司蔣德鈞等呈稱湘省各屬鑛產自蒙奏設阜湘沅豐公司之後又經紳董等體察

情形求有合於奏稱商情歸一商權歸一之指呈請將兩公司合併爲一以杜分歧業經批准在案凡湘省未開各鑛應行照案概歸總公司承辦查開採鑛產必先籌集費本疊赴滬漢一帶招集華股類皆觀望不前因查閱四川華益公司章程專集華股購買鑛山再行別立公司合股開採專辦購地一事需款不多易於招致爰擬畧仿華益公司辦法先集華股再議指地籌款以資開採應請咨明立案以憑遵守又查各處奸商或藉逾限作廢之局帖或造山主出售之假契任意招搖應請咨明如有此等奸商赴部稟辦湘省鑛產者一律拒絕其費本確實人尙可靠者仍飭自與湖南鑛務總公司各紳董當面議辦等情據此謹請查照仍祈見覆等因前來本部查湘省鑛務仿照川章先集華股購地再議籌款開採事屬可行自應准予立案至奸商執持廢帖偽契撞騙各節亟應設法防範以免中外商人受累如果到部嘗試自當力爲拒絕以杜流弊相應咨行查照可也等因到本部院承准此合就札行札到該局卽便移行查照此札等因奉此相應備文移知爲此合移貴公司請煩查照施行須至移者

光緒二十九年二月初七日

趙中丞

爾巽

奏片

光緒二十九年九月十五日

再湘省紳商集股設立鍊鑛總廠並設阜湘總公司承辦中路

南路各屬鑛產設沅豐總公司承辦西路各屬鑛產業經前撫臣俞廉三於二十八年六月專摺奏請立案奉

硃批外務部路鑛總局知道欽此欽遵在案嗣又據總公司紳董稟定兩公司合併爲一凡湘省未開各鑛概歸總公司承辦並設購地總公司先集華股購買鑛地以保自主之權亦經俞廉三電咨外務部路鑛總局核准有案惟查鑛地綿互費鉅事繁從前招股章程間有應者究以名稱不一權限不定未能十分踴躍奴才迭飭總公司詳定章程廣招股本合力興辦茲據總公司紳董呈稱現已共同商定仍照前案合併爲一銷去阜湘沅豐之名名曰湖南全省鑛務總公司初次先集股本銀三

湖南鑛務總公司案鈔

七

百萬兩並力籌官股以資補助所有湖南全省鑛產除鑛務總局現在試辦之新化錫鑛常甯鉛鑛平江金鑛外皆歸總公司經理以後本省外省外埠各紳商有願承辦湖南鑛產者祇准指定一鑛作爲總公司之分公司不得另設總公司一切章程必須遵守總公司所定其總公司辦公區域仍分三路以長岳常澧爲中路衡永郴桂寶爲南路辰永沅靖及乾鳳永晃四廳爲西路各派總理一人分任其事以專責成仍合辦總公司一切事件以期聯絡又由奴才選派監督官一員專檢察

國家稅項股本利息及一切財政各事宜並附設鑛務銀行以挽利權而昭大信其鍊鑛購地各事卽由各路總理就近兼辦

亦無須另立名目以歸畫一並據鑛務局司道詳請具奏前來
奴才覆查無異除將章程分咨外務部商部查照立案外謹附
片具陳伏乞

聖鑒謹奏本年十一月初四日接回原片奉
硃批該部知道欽此

鑛政調查局移奉院准商部咨覆湖南鑛務總公司註冊文
爲移行事案奉撫憲札開光緒三十二年七月十一日准商部
咨開接准咨稱據湖南鑛務總公司中路總理聶其昌南路總
理蔣德鈞西路總理黃忠浩稟稱查湘省鑛產二十八年間德
鈞等集貲稟設阜湘鑛務總公司承辦湖南中路南路各鑛又

湖南鑛務總公司案鈔

八

職紳忠浩等集股稟設沅豐公司承辦湖南西路各鑛至二十
九年間又稟經前撫憲趙奏定改名曰奏辦湖南全省鑛務總
公司其阜湘沅豐之名卽行銷去而分路開辦中南西三路各
派總理一人原議專集商股三百萬兩爲有限公司現今官商
股本共只二十餘萬兩所開五金煤鐵硫磺各鑛均係土法小
辦總公司自辦之鑛與本地紳商所開之鑛及租購之山均各
歸各路編列字號是爲湖南鑛務總公司現辦之情形近奉商
部頒發表式除另行填表稟請轉咨領照外謹將總公司奏定
章程及股票樣式稟懇咨部註冊立案等情相應咨送查覈見
覆等因前來查湖南省官紳集股設立鑛務總公司經理湖南

全省鑛產自係爲振興鑛務保守利權起見惟查本部奏定鑛政調查局章程各省鑛產均歸鑛政調查局查勘辦理今湖南省設立鑛務總公司經理全省鑛產自可與調查局協力維持諸事妥籌商辦惟何事應歸調查局主持何事應由總公司辦理亦應劃清權限報部覈奪又查本部奏定鑛章凡辦鑛應由本部發給執照未經發照之前不得舉辦今該總公司雖係經理全省鑛產惟該省所有開鑛事宜無論總公司自辦之鑛或紳商集貲開辦之鑛仍應遵照部章先將擬辦情形暨鑛地處所報部覈明發給執照再行開辦以符定章除該公司呈請註冊事宜由本部另案覈辦外相應咨行貴撫查照轉飭遵辦可也等因到本部院准此合就札行札到該局卽便轉移總公司遵照辦理查明詳咨毋延此札等因奉此合卽移行貴總公司請煩查照詳報施行須至移者

湖南鑛務總公司案鈔

九

光緒三十一年九月十四日

